

摘藻堂四庫全書薈要

集部

欽定四庫全書薈要

集部

文憲集卷十九



詳校官候補通政司經歷臣郭祚熾

欽定四庫全書薈要卷一萬六千五百九十八

集部

文憲集卷十九

明 宋濂 撰

墓誌銘

凡十九章

贈承事郎吏部侍郎張府君墓誌銘

漢書  
國朝之制凡官階自七品至於第四皆贈封其父母  
與妻上德至渥也於時吏部侍郎張度官品居四從  
例贈其父某君吏部侍郎母林氏德人命書既下度  
錄其副楮焚祭墓下復請一介蟻蝨之臣待罪銓曹

恩榮溥博逮及二親鸞綾金軸下賁泉壤度深懼無  
以侈上賜而垂示來裔莫堅匪石願吾子爲文之瀛  
謹按狀府君諱復禮字禮庭姓張氏廣之番禺人番  
禺有鄉曰黃岐角皆張姓環居之室廬櫛比當秋宵  
月白燈火連接而讀書之聲相聞宋紹興間有諱堦  
者始遷于禮園社堦生飛一通周易能會粹諸家之  
說而折衷之廣之士大夫推爲宗師號曰黃岐張氏  
易歿塋社之南山配麥氏生二子彬甫鄰甫皆善傳

父經既塋父晝夜念之弗置構堂曰永思兄弟躬耕  
以奉歲時享事彬甫娶羅氏生丈夫子三其次即府  
君也府君薰炙家庭之教而于易學尤精發為大義  
頃刻千餘言出入朱程二氏無乖謬者漢儒拘泥不  
通或流于術數痛麾斥之當是時科目方盛行鄉人  
士咸謂府君爵祿可以引手致府君笑曰學易者為  
知吉凶悔吝而已何以官為獨念居處村疇諸子見  
聞孤陋乃築室都城中俾就名師儒游見其成立輒

喜動顏色已而度舉茂才去而爲肇慶路高要縣學教諭迎養甫六齡而府君歿矣時至正二十一年辛丑四月二十三日也享年六十一國朝洪武元年戊申十月十五日度奉柩塋于增城縣西之章山因遷家焉四年辛亥度受薦入朝拜監察御史以至今官風采凜然貪墨爲之屏迹君子賢之府君四子長卽度次輔次峻次熙輔峻俱蚤世孫男二曰原潔曰吉祥女五人昔人有云爲善者譬猶藝禾世世能令嘉種不絕則其發育也

益昌且碩矣信哉斯言也府君世爲儒積善之聞播於  
海南實合於易積善成名之義今度位居法從其聲益  
大以宏是皆府君遺休垂祉之所致度方欲爲親榮而  
府君不及見矣悲夫此墓門有碑其銘固不可不勒也  
銘曰

一屈一伸其理孔神易道之門君子之攸遵宜文而彰  
乃韜其光不露而揚俾後循之昌有命自天寵臨昭宣  
鬱葱而綿延是爲張氏之阡

元故文林郎同知重慶路瀘州事羅府君墓誌

銘

嗚呼士君子立志孰不欲建功名垂竹帛哉或不能逢  
其時時逢矣或剛正忤物坎壈至死卒無以達其志志  
弗達矣使其名復寂寂無聞其鬼不靈則已脫稍有知  
未必不鬱悒於九泉之下操觚任紀載之責者寧不爲  
一動心耶此余於廬陵羅君殊惻然也嗚呼君諱文節  
字仲正姓羅氏羅爲江西右族唐肅宗時自洪都遷廬



陵之秀川入宋以來家談仁義而人悅書詩以通經上  
南宮對大廷者幾無虛歲朱紫相承照耀州里起綰郡  
章者四人而邑之令佐尤夥焉曾祖時誠祖宗權鄉貢  
進士父履泰字以通爲元之鉅儒著書滿家春秋禮記  
周禮三經皆爲之集解復行河洛圖書之義列圖三十  
多前修所未發出其餘力補正戰國策舛誤數百條且  
爲年表以次其先後行丞相府聞其名署東湖書院山  
長蓋世號道齋先生者也君始能言其父抱就書室抽

一卷授之祝其疾讀君指插架牙籤曰吾齒稍長雖盡  
通之未嫌也其父驚喜暨肄小學輒以氣雄諸生莫敢  
與其齒後從宦東湖賢士大夫咸折輩行爲忘年交問  
學日進水湧而山出撫州判官燕君某辟爲郡吏郡有  
獄疑不決守貳爭以爲問君歷階而升摘其案語曰如  
此則爲直如此則爲枉儕類大慙出奇計沮君會朝廷  
有詔造鹵簿器仗遣君至屬縣督其成君至樂安憇縣  
解中羣吏更謁互諫以爲鬼物所馮不宜居君笑曰惡

有是乃酣飲而寢夜漏下十刻月色微明見丈夫長而  
青立與檐齊君奮起執之曰爾來矣爾來矣應時而滅  
黎明視之並解有豫章穹隆而數腴縣人祀以爲神君  
曰其怪在爾矣歷數其罪用竹楔釘之未幾豫章枯死  
怪遂息郡有織錦工嘗籍于官竟遁入武昌出入辦章  
溫公門溫勢燄熏灼莫敢誰何復嗾君捕之縣知之不  
敢受君牒君直訴辦章辦章曰爾胡不求之府公乎君  
如言而往府公搖手相戒亦不復出一語君怒奔走辦

章門辦章厲色斥之曰業已屬爾矣復來何邪君曰工  
合應官繇府若縣謂其爲社鼠城狐不能詰區區小人  
固不知何所指明公乃方嶽大臣不助半指之力如廢  
王法何辦章語塞即下令捕與之衆益譁曰是尚不畏  
溫辦章其有我輩乎謀出之益急君懼禍及累糧馳燕  
都燕都貴人亦忌君峭直高門縣簿無可投足者遂入  
成均爲弟子員一日方挾冊諷詠有相者謂君曰君兩  
顴入鬢當邊徼建功無以久淹爲也君遂用國子助教

姚公登孫之薦上於集賢集賢移文雲南行中書署君  
昆明州學正秩滿陞授孟傑府君列蠻夷子弟曉之以  
君臣父子之懿辭氣激烈聽者聳然轉普定府知事廉  
行彌厲大理金齒宣慰司辟爲令史豪酋侵人疆畝持  
黃金數鎰爲君壽乞君勿右愬者君麾之去酋怒曰君  
薩達克齊邪乃不納吾金也薩達克齊鎮雲南之名相云君  
卒奪田歸愬者乾崖酒里當賦金使者至蠻人納賂往  
往過所賦之數而金又不可免君至憫其愚反覆開導

之蠻人鼓舞于庭曰微使者之廉孰能恤我至是亟輸金而還俄入掾雲南行中書雲南驛騎皆官中給直官吏乾沒之以市馬責土酋君曰爲天子牧元元者顧若是邪痛懲其弊朝廷以雲南在萬里外下吏部準循舊比行銓選之法使者至選君承其事君知積弊未去且曰王者無外敢不靈承上命以正其法乎獻五策於使者吏受民賄者官不稱職者廩歲不會者月日不登者居制未終者皆不調使者大悅悉從之倖門遂塞滇池

有神蛇能興雲雨會大旱民屢走池上若無聞者君爲  
檄責之片雲歟然興雨因霑足南韶海中積葑成淤而  
浮游水上夷獠耕稼之號曰葑田田如不繫舟西東無  
定人交相爲盜君命紀字爲號䟽其步晦及四畔所屆  
上于官官爲給券使有所馮復植木伐海岨嚴其畛域  
不相淆亂或海潮漂蕩有藉以爲奸者俾出券環證之  
竟歸其田夷獠指示子姓曰此羅掾所賜也否則人盜  
之久矣監察御史至每名君于庭事難定者必待君言

而後決雲南王亦熟君行命陞爲提控掾史提控掌六房之政人多畏縮不前君益淬礪弗少怠適中朝大臣喜意以失宰相意出參省事銳意更張庶事悉心任君君知無不言言無不聽名聲翕然動蠻夷中先是蠻夷有鐵甲郎者負固不服至是謹曰天子遣賢輔臣至矣奈何不降帥未附者皆來歸君之功爲多鎮戍萬夫長伯胡行事多不法憲府繩之急伯胡擁兵以叛累歲不能討曲靖宣慰使鬼宗亦蠻酋也助兵一萬夾攻之伯



胡就縛莫府上功擢鬼宗叅知政事將上省臣上下莫  
不與之君力爭曰雲南親王臨蒞之地辦章而下多八  
座大臣何得有蠻酋位邪苟錄其功使以叅政之名自  
鎮其土足矣不然國體其謂何空一府咸曰微羅掾幾  
失之矣鬼宗懼托君鄉人囊金以獻君怒曰腕可斷案  
不可署鬼宗恚而止君疾惡如仇讎聞部使者德住貪  
暴賦虎神詩以爲風德住銜之賂西行臺御史以專權  
自恣劾君君走愬中臺遂擊德住去之夷人大快君以

常調除承事郎同知彌勒州事政成謁選吏部遇鄉友  
羅玉於逆旅乃勸君曰君以剛毅取嫉于人致齟齬一  
世秋髮已續紛被肩何不謝事以佚老乎君慨然曰子  
言誠是也乃上乞骸骨之請以文林郎同知重慶府瀘  
州事致仕年僅六十三耳居數年中原道澁乃犯鯨波  
之險由海道至閩中而江西兵燹方亟遂不可還以至  
正二十六年十二月壬戌終于福州之民舍君未終謂  
其友曰此正吾死所也夫何憾時閩猶奉元正朔云其

壽八十洪武五年冬君之喪始還明年某月日始祔塋  
先兆龜山之原君長身而瘠胷襟磊落如青天白日喜  
面折人過雖王公貴人無所避故有過者常畏君知亦  
有幸其知以自改者民事有屈而不伸君庶得其實忿  
忿見乎色必以告司法吏因得白者甚衆知識尤絕人  
每言某地當有兵變時承平人競指笑之其後果然始  
服其先見生平急患難重倫義族叔繼賢久居燕頗饒  
於貲與妻柳皆老而無胤嗣乃迎羣從子觀遠爲後觀

遠至甫七日而繼賢夫婦死其服役者羅叅出而呼曰  
我嘗爲子矣觀遠何人乃欲與吾事邪觀遠弱噤不能  
對君亟告公府遂叅盡囊括其貲授觀遠且具舟車使  
扶二喪還江南不特此也凡遘疾疾貧窶及死喪無依  
流離不能歸者君必捐金倡義士周之初不知其爲何  
如人也君娶劉氏子男二人長大紀有文學而剛介酷  
肖君次次炳贈番禺縣主簿初次炳爲奏差廣東宣慰  
府宣慰使釋迦班嘗招峒丁三千即遣征連州峒丁怒

至清遠將爲變衆憚弗敢往次炳請前峒丁寧弓相向  
次炳給之曰宣慰命我來賞汝寧弓何爲也峒丁退與  
清遠令歛繒帛散之乃率以往至連爲寇所敗次炳被  
擒備極慘酷竟不屈而死致有今贈女三人長適郭滋  
蘭先卒次復爲其繼室孫男一人倣曾孫男一人某君  
塋後二年大紀汲汲圖君於不朽以國史編修趙君堦  
所爲狀請謨墓門之銘嗚呼予昔總修元史每求剛正  
之士在下位而不伸者載焉蓋以謂雖不能拔之於當

時聊使其暴白於後世庶幾死者無憾而生者不媿惜  
乎有司不上君之事也於是徇大紀之請執筆而具書  
之百世之下必有因予文而知君者雖然予何人哉文  
之傳不傳固不可必也所可恃者世人豔君之行頗多  
多必則倣之則倣之必相與謹視之文其有不傳者乎  
信有人如君終至湮沒無聞則夫天理人心皦如出日  
者果爲何說也嗚呼銘曰

堪輿之間正氣烈烈在人爲剛在物爲鐵鐵尚可鎔剛

則弗屈挺然常伸欲不可湮

其

一惟君之生能以志雄導

養以時日擴以充百壬所忌吾惟正從譬彼川流萬折

必東

其二

古惟正人妖不敢干芄芄豫章變爲枯管誰鎮

大藩乃復蔽奸我往折之聞者膽寒

其三

夷人何知推結

卉服宣厥彛經丕變其俗爾金我辭我直爾曲凡施惠

利惟日不足

其四

威靈既震叛民來歸鐵甲旣旣棄戈而

嬉有聲洸洸有澤輝輝有知卽爲不識位卑

其五

繡衣孔

揚其貪若狼我斧我斨莫不加其亢形之聲歌庶懲而

覆覆謂我狂詈我以涼

其六

持此而行何適不艱坎壈其

躬恬夷其顏胡不爾庸以承爲冠鷹隼一出狐鼠盡跽

其七賢否易位曷以爲政君亦何傷人爲嗟咏禾黍離矣

涼颼棘矣吉士亡矣何嗟及矣

其八

故處州路慶元縣儒學教諭張公墓誌銘

濂當弱齡嘗游學郡城中時王教授雲卿方之官嚴陵  
忽持錢行卷示濂中有浦陽張公詩音律清麗而事體  
莊勁得八分之正心竊慕豔之後七年始獲拜公於月



泉里第公風神峻潔眉目聳秀遠而望之若玉井冰壺  
絕無一毫塵土意及聆其論議則纚然如貫珠退因私  
念前輩沈涵深固故其見於辭氣者有不及未嘗不自  
歎鄙吝粗穢而莫克攻勵之也方將爲問道攷德之圖  
居亡何而公亡矣又後十年公之子端臣件繫羣行爲  
狀來金華山居請瀛爲之銘瀛誠後死不可謂不知公  
者銘何敢辭公諱恕字如心姓張氏爲婺之浦江人曾  
祖貴宋宣義郎祖祚承信郎父森湖南潭州路教公幼

而穎悟取家中遺書晝夜研磨之雖暑爍金寒折膠不易其恒度迨長聲名藉藉起士林間遠近來學者戶外之屨常滿已而用薦者教授常德之武陵遷婺之東陽處之慶元公所至皆以興學爲己任招集弟子員危坐堂上列羣聖人之書爲之數繹大義皆充然有得士風爲之丕變尋以母夫人春秋高歎曰孝者百行之冠冕吾母鶴髮垂領尚可宦遊而弗之止邪自是夷猶里閭日侍夫人之側當風日清美或杖藜行佳山水間如嗜

飲食或勝友時集輒商略古今上下數千年事及藝沉  
淪茗賦詩自娛有不知老之將至也公素患脾疾至是  
發寢劇遺命治喪勿用浮屠氏法當依朱子家禮從事  
遂瞑公生於咸淳辛未十一月乙亥卒於至正癸未六  
月乙卯壽七十三娶方氏有婦德克配君子生子男六  
人虎臣端臣鼎臣稷臣純臣敬臣子女二于貞方元亨  
其壻也孫男五人僧家奴道童留孫復生憶祖僧家奴  
復生早卒孫女三人其年十月己亥寔公於縣東五里

原先塋之側其所著書有詩集若干卷藏于家云夫自  
師道不立後生小子失其所依憑無以承藉其所休社  
而甄陶其性情故蒞事制物動與理違深爲識者之所  
慨嘆有如公者惓惓以斯道淑諸人所以爲世防而昭  
民能者實於是乎賴而公竟死矣雖然公之子皆業儒  
端臣博學而能文辭尤號最良者也橫經邑庠中俊秀  
子弟皆環聽之公雖亡其不歿矣夫銘曰

孰武其先公則式之孰牖其後公則迪之累世之儒聲

華燈而況公之施三爲校師矜珮逶佗左矩右規鑽石  
幽墟以昭以貽里中子宋濂謹譔

嘉議大夫泉州路總管朱公墓誌銘

濂少時即見莆士朱公廷試文數篇已歎其不可及後  
二十年聞公官閩中所歷有聲尤慕服之及今又閱二  
十餘年公之孫瀟以墓銘爲屬間公之死已十七年而  
濂亦老矣嗚呼其何忍辭公諱文寔字原道姓朱氏九  
歲能文十三從進士林君岡孫學經每日暮須諸生出

獨援疑義難其師其師驚歎之元至治癸亥以尚書舉  
進士丁外艱去至順壬申再舉遂上名南宮對大廷名  
列第十賜進士出身擢同知瑞安州事階承事郎改汀  
州路總管府推官轉承務郎調甌寧縣尹進奉訓大夫  
御史交薦于朝除福建宣慰司都事丁內艱起知瑞安  
以大臣奏授奉議大夫福建儒學提舉遷同知泉州路  
總管府事陞奉議爲奉政至官引年辭歸遂以嘉議大  
夫泉州路總管致仕命未下以至正癸卯八月九日卒

于家年六十九公同知瑞安大府檄公均瑞安平陽永嘉之役不爲權沮財奪民服其平爲甌寧行均役法上官以其舍人爲屬請緩之公格不奉命上官怒誣搆公罪部使者廉其非辜獲免且以訟牒三百委公治之公從容剖荅而退不能有言其知瑞安盜起旁境陷陶山天門諸堡募壯士攻破之斬其酋以徇颶風挾海水漂民廬舍公發官廩按行漂所賑之其提舉學事逐其苟職者易以儒儒悅之公孝友切至以父不迨祿養言輒

涕泣事母惟恐拂其意撫五弟教而有恩居官無廢事  
公暇講授不輟學者因所居稱葵山先生嘗考閩浙江  
西三省士所取得美材爲文本於理不爲浮辭曲辨陳  
監丞旅稱之有集若干卷藏于家公之先建安人曾祖  
德誠宋潭州駐泊祖治安元河南等處醫學提舉父世  
英始遷莆以公貴贈奉議大夫同知興化路事驍騎尉  
追封仙游縣子母林氏贈仙游縣君夫人池氏封如其  
姑年若干以丁酉某月日卒于瑞安是年十二月十六



日歸葬常泰里雙牌山之原及公卒穿夫人之墓合葬  
焉甲辰七月二十一日也男一人鏞古田丞六女適校  
官林敏中漳州路同知王謹惠安尉胡顯祖及黃孔脩  
李某王某孫男一人即瀟國朝鄉貢進士能世其家銘  
曰

在元中世士患無位持經挾策就有司試試者爲誰或  
哲或愚或以微類弃照乘珠及其既獲爾州爾邑有所  
不通爲吏侮執有美朱公游薦而登左律右經吏駭且

傾剔蠹平徭如衡稱物有撓之者正色不屈既典方州  
亦司儒臺黜士之賈誅盜之魁曷其致然維學知要學  
以爲政天下猶小彼何弗思訾儒爲迂刀筆拘拘視公  
何如公政在民無銘亦存銘匪銘公告其後昆於公是  
效公德孔多尚食其報

故岐寧衛經歷熊府君墓誌銘

熊君伯穎卒其友之仕者爲之請銘余曰君與余善且  
才而文銘余所宜爲後數年余致政歸衰老多病未暇

具其事而爲之請銘者亦亡余曰噫余可負吾友耶乃  
按故所書爲銘君諱鼎字伯穎姓熊氏撫之臨川人世  
以尚書教授于鄉君少有敏質年十八從父受經義通  
之每私較試輒冠其鄉人鄉人推讓不敢與齒後六年  
爲元至正七年領江西第九名薦書上燕京就禮部試  
文彩熒然動人偕試者竊視執筆不敢下衆咸以高第  
期君有司以君議論奇竟棄不取君絕不爲意曰第不  
第命也命可尤耶束書南歸當時名人若張文穆公起

嚴余忠宣公關李諭德好文張承旨肅危左丞素揭秘  
書泐黃助教俾皆重惜其去相率爲文辭以餞君退而  
益脩其業十一年江西行中書省檄爲吉安路龍溪書  
院山長龍谿故有田屬他邑前山長久不理浸侵之君  
至問吏叱曰國家置田以養士田亡士將安食即檄所  
治徵索既具弟子員肄業如令月旦望玄端深衣據席  
講說程其良否而獎督之無賴徒陳小峯縱其子寧爲  
直學握出內之柄每與山長抗禮君按法黜之小峯噤

不能吐氣以死郡守妻喪遇兵亂其子撤山長座將遷  
柩明倫堂上柩至門君叱止舁者寘諸別室復欲以浮  
屠祝屍浮屠方以鈴鉞至君怒撞壞之曰此吾孔子堂  
豈浮屠廬耶亟屏去勿污我守聞嘉嘆君而以書謝曰  
先生教我厚甚時江西寇漸起所在擾潰不可爲職諸  
郡帥守知君練籌畧往往延問軍政君亦以拯民自任  
悉心力爲之計贛郡帥綽班薩里尤器君命君擇險  
隘爲守禦備君於皇恐大蓼諸灘設坑穽建砦柵構屋

三千餘間結民兵自守由是賴獨完於他郡戍將三人坐戰敗將加誅君爲救解出之會當大比他郡多以兵廢君獨請全舉行觀者以爲異事吉安歲凶全與吉安守有隙禁吉民勿入糴民啼號于道君爭曰盜之起者爲饑寒所迫也今使君閉糴將開盜門脫吉民事亟生變賴能獨全乎全悟即罷前令君周旋兵間委曲爲民皆此類十三年郡多君前績便宜擢君賴縣尹員外置君耻之辭不受未幾以父喪歸服除兵部尚書黃昭江

西廡訪使吳當總兵出閩闕辟君叅謀軍事君爲昭畫  
策甚詳會昭與當罷兵柄策不行二十一年陳友諒僭  
號於九江用黃昭解觀等薦以君爲太常卿俾守令踵  
門起君堅卧不赴既而國朝兵入江西武順寧河王鄧  
愈聞君賢下令徧索君強起揖王軍門王與君論事合  
大喜致帳中日夜咨以事一軍驚謹以爲主將得師君  
見王寬裕誠大將材遂委身從之不去贊王取撫州兵  
不血刃賊酋鄧克明夜遁二十二年皇上親將兵入豫

章州郡望風歎附九江亦下君得詔見慰勞甚至二十  
三年丁母夫人憂後三年以大臣薦徵至南京奉旨偕  
諸儒撫古昔嘉言善行作公子書以訓貴戚子弟書成  
賜襲衣白金會初平浙西授湖州府德清縣丞君招輯  
綏懷除剔宿蠹創三皇孔子廟建官吏廨署到官數月  
事治政平錢鶴皋反嘉興聲搖德清民皆逃散君堅坐  
鎮之錢不敢入吳元年上將正位宸極召議禮儀除中  
書考功博士尋遷起居注承詔搜括故事可懲勸者書



新宮廂壁時上精求禮樂之事嘗召翰林學士朱升等  
陳樂器于庭上擊磬命升辯五音升對忤旨上大怒欲  
寘諸法君從容論解之上曰升每謂審音顧不辯宮徵  
何耶君對曰石音難辯自古而然唐虞惟后夔能和磬  
聲書曰於予擊石拊石百獸率舞上曰任此豎儒治樂  
樂何繇和君具言樂之和由人所致人君能致中和則  
萬民和萬物和而樂音和矣上怒乃解釋升不問升既  
出謝曰非熊君吾屬幾殆舍人耿忠奉使回奏廣信郡

縣官多違法前所陳茶稅失實時新行赦上怒趣中書

遣御史往廉狀丞相李韓公善長諫不聽御史已受詔

丞相復諫不從君與給事中尹正諫曰朝廷新立將布

大信於四方今肆赦之後復以細故而煩御史按問既

失信且褻國威上良久乃曰止其追御史毋往上詔浙

西民輸糧京師浙西小不可浙江率五石致一石民甚

苦之君叩頭曰國家都金陵以浙西爲根本而遽困之

農作方興而僕僕於道路苟一年不得耕害不淺矣上

悅是日即詔罷之明年改元洪武上即皇帝位凡創制  
更革之典君多預聞上遇君厚每字稱而不名立浙江  
提刑按察司以君爲僉事階奉議大夫君分部台溫二  
部經方氏竊據之後全乖人道爭訟以數百計君悉理  
其曲直而奏斷之凡威取田宅者歸業主得半直者中  
分之兩造無驗者籍之官豪胥猾隸六百餘戶悉并之  
別郡僞官悍將二百人其暴如虎狼君出奇計盡刮種  
類遷於江淮間民始安枕方氏居黃巖雖嘗簿錄其家

珠玉犀象金繒藏於姻家者動以萬計君皆搜索送諸官溫有邪師曰大明教造飾殿堂甚侈民之無業者咸歸之君以其瞽俗眩世且名犯國號奏毀之官沒其產而馳其衆爲農其地多倡家中朝使者以事至多挾倡飲有司罷於供應君下永嘉令籍倡戶數千械送之京按使者以法鉤連其他贓罪杖流之僞萬戶金甲奪三人妻其夫訟則更爲娶婦君至三夫皆訴君論金棄市各以其婦歸之平陽軍校掠農妻五年君攝其妻至軍

校恐抱二兒泣曰妻去兒孰與養願公憐我君命寘兒妻側兒避不肯近君曰此非其子詐也詰之果鄰家子罪校如律而斷其妻還于農於是軍中所掠婦數百皆相告語夜遣去一營幾空平陽州吏目杜乙嗜財甚考滿入京謁御史中丞劉基基詰謁故杜惶駭不能對遽命執訊之杜自陳在州時斂民白金三十兩又受楊某金置殺人罪不問守與佐皆相構爲姦有旨下君鞠之同知以下吏皆服罪獨知州梅鎰廷辯不已民數百

遮司門外爭知州信無辜君將聽之吏白曰今奉詔按  
獄而釋知州不治情則得矣如身受故出何君再進民  
詢之辭不變歎曰法以誅罪吾敢身畏譴而誅無罪人  
乎釋鎰以情聞上可其奏台臨海王叅理妹有姿色許  
適嵎縣竺氏其內兄方敏覘其將嫁夜率衆劫至家逼  
爲妻王詣永嘉侯朱亮祖訟事下邑方賄吏欲傳輕典  
君知有賄急速吏治之吏具狀竟致方死罪而歸女竺  
氏兵克黃巖時州民乘亂報仇殺一家十餘人永嘉侯

受辭令州捕鞠州初附假守捕殺人者十二人獄既成  
吏受賕釋之詭以死聞縱其餘黨不問君錄囚廉得十  
二人尚頸繫東郭民家即收掠問狀抵官吏以賊罪捕  
餘黨誅之黃巖官署毀于兵官寓尼寺中并儲糧其間  
君視糧過寺尼數人來謁皆美少年也問孰爲主者則  
方氏女弟也君大驚跽州守通判以下切責之令逐尼  
歸俗而以寺入官州有宋杜清獻公墓杜氏有田若干  
畝入僧寺儲其租以奉祀僧挾與方氏連奪田以爲已

有復墾田侵墓下墓且蝕其孫回以書聞君執僧寘諸  
獄瘐殺之追田與回且令州立祠刻石以旌之寧海強  
民陳德仲以憾支解黎異異妻屢訴無爲白之者君受  
之一夕省黎事有青蛙立案上君曰蛙非黎異乎果異  
則止勿動吾復爾寃蛙果如君言明日逮陳誅之縣民  
馮輔卿至正中爲亂與方氏連兵既而方氏追殺之且  
歿其貲產而餘田百餘畝其豪奴吳自取之輔卿妻杜  
囚服迎拜馬前訴奴君爲治奴罪奏以田還之台地產



鹽鹽賤而米貴時官賣鹽一斤責米二十五合反貴於

米數倍復輸於杭路險不可舟車民病欲死君上封事

乞民得償錢民獲免轉輸之勞凡事之未便者君皆爲

奏之兩郡民灑然如更生始兩郡旱公所至輒雨民曰

此熊使君雨也是年秋始立按察司於山東擇其人行

新政上曰無如熊鼎矣遂仍前階改山東開治濟南濟

南元有廉訪司廳事壯麗甲諸道臺檄君居之時汪丞

相廣洋以叅政建行省其中僚吏請君以臺檄白省而

復之君曰官在政事何如耳豈以公署之麗耶城北有  
庫陋室君就其中治事丞相聞君言戒其屬曰此真憲  
官也吾等慎毋犯之山東爲齊魯之域其民敦樸少訟  
君鎮之以靜而以保民爲先時河北甫定濟南宿重兵  
兵肆暴侵民莫敢與較君移牒指揮司禁之黥軍數縱  
火劫人一家火則一市財皆殫君既申火禁督邑令庀  
火具爲保伍相赴援復懸書通衢戢士卒士不戢坐所  
轄將火患頓息偏將有受部兵一繒者君收問連其黨

獄之諸將大駭挾日出于庭數以黥貨罪准律贖金而

縱之諸將又大喜由是莫敢橫恣東平侯韓政鎮濟寧

奉旨按籍選壯強爲兵東平東昌濟寧三郡民皆驚散

將爲變君急飛書行部僉事段明德說韓侯止之分遣

官屬招輯俾復業越三月民始定州縣官多失庶平君

陰風跡數十輩悉如法論罷之六郡肅清齊河有強盜

劫商人布千疋縣求盜逸去吏索之村中遇王氏婦不

得於姑出走吏見其色動執訊之婦曰我王六家人也

吏因考筭使其誣服爲盜訛爲王六家兒且指平人三十餘人榜掠無完膚問王氏夫安在衆不勝苦詐云已殺之沉於河矣追所刼布及屍無一是者獄已具君盡得其情而王氏之夫故在君坐官吏以法而悉遣之君患官好致訟乃令郡若縣各置二厯日著所治獄訟錢粟之績一留郡縣一上之憲府遞更迭易月按厯而鈎考之凡所爲事莫敢隱者後遵以爲式大明律初頒吏莫能通君日坐堂上立六曹吏堂下條授之與之辯析

俾各通其法名聲赫然著聞凡疑獄皆質焉上嘗廷稱曰  
聞熊鼎爲政得體朕甚嘉之二年十月臺臣奏山東憲  
司缺副使上曰朕得之矣詔陞君爲之三年四月封建  
親王擇王府臣僚上御奉天殿丞相以下咸侍上首問  
曰山東副使熊鼎稱是選乎衆皆曰賢上大書君姓字  
于几復問禮部尚書崔亮曰鼎何如對曰鼎誠賢上曰  
朕固以爲足任也遂驛召君五月拜晉王相府右傳階  
中奉大夫會有事于方丘君受告導駕既齋宿習射苑

中百官鴈行入上勅近臣以弓矢授君射君文臣素不諳習一發中鵠上喜勺湏飲以賜明日又射上詔君至榻前俯身御弓矢爲射容以教君君跪受弓左執之右手指一矢韋二矢向鵠三發連三中上嘉勞久之將遣之國上御端門君及秦王相鄭久成等以次就坐上敷揚治國之道逾數千言反覆獎諭甚至君等皆叩首謝賜食而退乘傳至晉陽議建王都城命工入山度材木治瓦甃四年大興衆築城作王宮君夙夜不懈七月奉

相府賀生辰表詣闕至則車駕將幸臨濠勅從行數被  
召問恩寵有加九月辭於臨濠上倚馬詔以處將帥間  
協和之道且曰汝不善騎勿庸自來君還會徙沿邊諸  
襍羗萬餘入內地護卒弗嚴道亂奔散太傅徐魏公達  
發兵擒殲之事聞詔使詰責叅政曹興等併免君官左  
遷大同衛知事五年召還六月除晉王相府叅軍以尚  
書授王復奉詔兼授秦王經翰林學士承旨宋濂時兼  
太子贊善大夫復薦君說書皇太子前君於書最深每

以帝王心法之要陳之太子二王雅加愛重明年上御

文華堂召君問曰秦漢以來諸侯王不肖者幾何君謝

未攷遂命之蘇州覈糧長罪狀君至擇其尤虐民者杖

徙之鳳陽事畢復入王府七年三月上御西苑復以諸

侯王事爲問君復謝未遑改刑部主事奪叅軍所受俸

八年正月授岐寧衛經歷賜白金五十兩錢萬三千文

上復念君在邊良苦遣使持手詔諭君詔上所親製辭

意甚厚有狐裘纁袍毳襪之賜時多爾濟巴勒雖降而持



兩端君上書萬餘言言狀其畧謂西涼岐寧漢唐內地  
不可棄朵兒只把非有歸向之誠特假我聲援脅服鄰  
邦爲自安計朝廷宜思制之之道急之則必席卷而遁  
雖得其地而無民緩之則恐羽翼既成而跋扈宜稍給  
種糧撫其遺民以安衆心而以良將叅守之則多爾濟巴  
勒特匹夫耳又將安往上覽書曰人謂熊鼎迂濶今  
不迂也九年四月乃徵君還次西涼府打班驛遇多爾  
濟巴勒叛兵擁君北行君力爭不從遂與中使趙某等皆

遇害時六月二十三日也壽五十有五後數日亂兵就擒獲君所佩囊中公牘始知君卒跡其骸骨葬于某地西涼衛以聞上感悼遣使吊祭命臨川恤其家其子某以某年月日至某地以其骨歸以某年月日葬于某山君學有應世材內行尤修飾仲弟渙爲開封府延津縣主簿受誣以賊罷官死妻子漂流無依貧不能償其贓之半君以已俸代償之致其妻子于家諸姑適俞氏夫與子俱喪無所于食君成養之終其身喪葬之禮無闕

者與人交誠樸不欺臨事善斷故居官必有名曾祖某  
祖某父某俱通經術母某氏有賢行娶某氏男若干人  
女若干人初君將之岐寧子某來見京師君口授所行  
事俾書之且曰我死生未可必或死我無累汝者當今  
惟翰林宋先生文可傳我嘗獲先生知汝以此拜乞銘  
先生必憐汝幸爲我銘我無憾矣嗚呼余言豈足恃耶  
而君惻惻若斯尤可哀也銘曰

天祐皇明以民授之必生其人俾左右之啓國之初俊

才如雲其心之貞允惟熊君執筆載言侍帝黼扆從容  
論奏爛然可紀豈徒能言亦見于行繡衣直指以蘇南  
氓彌強剗穢洗濯積垢南氓稽首君我父母君車自南  
民望于東帝曰汝來唯民之從齊魯千里厥土歲荒君  
居二年化爲畊桑帝謂相臣鼎也可恃不負吾民寧負  
吾子維晉巨國維傳大臣將終任之命則孔屯既入授  
經復出治戎狐裘毳衣唯帝念功封論邊事其策甚偉  
欲召用君君則道死天子聖神用無遺才天困其逢賢

者所哀生有事功歿多子孫銘圖其傳以示千祀

元故累贈奉訓大夫溫州路瑞安州知州進飛  
騎尉追封樂清縣男林府君墓誌銘

府君諱邦福字彥大姓林氏林出殷比干之後辟地林  
山因以地爲氏子孫分居清河至漢太子太傅尊遷濟  
南晉太傅禮永康間又遷下邳永嘉之亂合浦太守祿  
又遷閩之溫陵自是閩中多林氏唐貞元中莆有孝子  
攢爲福唐尉棄官廬墓致甘露白鳥之祥詔立闕旌其

門孝子五世孫諱某當五季時仕于唐及沒夫人執氏  
扶櫬還閩道經溫之瑞安值閩亂遂墓于縣之塔石村  
有馴鹿之祥人號鹿阡執氏卒合墓其地自後九世子  
若孫咸環墓左右其諱文慶者實夫人之九葉孫生古  
溪處士諱益甫復遷郡城生台州路總管府照磨諱桓  
實府君父也照磨君以孫常官七品當封父母援故事  
讓於祖贈從仕郎江浙等處儒學副提舉妣黃氏贈宜  
人府君局度孤騫不爲屑屑詭行弱冠出游蘇府公廡

其賢辟爲史蘇之寓公多權要願指氣使州縣皆唯唯不敢較府君毅然不爲屈有請托者却不聽且曰國法何可以徇人積勞當調州之幕職江浙行中書以筦庫缺官借授處州松陽監稅改監紹興如坻倉府君釐革弊政出內皆有程顥粟弗私轉嘉興陶莊務副使時浙西大侵民嘯衆攷餽糧與抗者輒見殺上官檄府君攝尉事府君授以籌畧分遣弓箭手掩捕之未幾皆獲議法者悉付重典府君走白部使者曰饑民無食雖萬死

不顧何往而不爲亂原其初情不過魚游釜中少活須  
臾之命如法家議無乃太過乎使者以爲然免死者數  
百人轉饒處二州州之務居城闔稅課每屈府君運量  
有法皆以最登秩滿監衢州常山務絳巾賊起沔陽江  
浙諸郡皆繹騷弗寧時浙省左丞高昌公出鎮廣信專  
總戎事署府君常山尉府君集義旅數千淬礪戈矛使  
習坐作擊刺之法號令精明部伍整飭不亂狗鼠輩欲  
乘隙鈔掠者皆吐舌散去會子溫登進士第擢休寧尹



尋補江南行臺掾迎府君就養未幾御史大夫子恣爲  
不法人言沸騰溫以親故未忍撻其姦日恒鬱悒不樂  
府君謂溫曰吾能安吾貧慎毋以老身不行其志也明  
日溫率同列謁大夫力斥其子之非大夫慙甚既退溫  
即抗章辭去奉府君還鄉浙省左丞相康里公時承制  
得專封拜擢府君鄉郡知事郡民舉手加額曰吾州害  
與利林公知之我民庶有瘳乎適山寇竊發掠慈湖將  
窺城上下洶洶府君白于府曰事急矣奈何吾將以三

寸舌却之乃單舸直走賊巢諭以禍福賊見府君至大  
駭爭持白刃相脅府君厲聲叱曰朝廷何負爾輩乃敢  
弄兵反藉使州縣賦斂急或不能堪當訴之方岳大臣  
足矣今乃自麗刑憲官軍旦夕且大至舉族當作菹醢  
吾憐汝輩愚特來示以生道乃欲吾脅邪吾不畏死者  
任爾爲之任爾爲之賊衆愕眙相顧再拜謝曰明公言  
良是微公吾屬入鬼錄矣皆俯首退去爲良民如初朝  
廷時遣近臣經畧江南官有異能者必超擢之有司方

以功狀聞府君竟以疾卒壽六十又七府君明白坦夷  
不尚鉤距遇事曲直輒辯白無少讓人初難之終服其  
明斷性好施與人有急難振之唯恐不及處伯仲間無  
間言尤篤於訓子故卓然皆有成立既而溫改福建行  
中書省管勾得請于朝封府君文林郎汀州路寧化縣  
尹夫人王氏贈宜人及溫累陞員外郎加贈奉訓大夫  
温州路瑞安州知州飛騎尉追封樂清縣男夫人亦加  
樂清縣君府君卒之日至正十九年夏五月癸丑葬之

日其年冬十二月甲申墓在永嘉縣建牙鄉先塋之側  
王夫人先十七年卒子男子四人長即溫奉訓大夫福  
建等處行中書省左右司郎中次常從仕郎泉州路德  
化縣尹次嘉福寧州知事次寧行宣政院宣使子女子  
一人適福州長樂稅課提領項昱孫男七人本秉東乘  
策某某女四人曾孫男二人某某女一人嗚呼天之生  
材也一元之氣既運無往而弗周譬諸木焉或可爲棟  
梁或可爲榱桷未嘗不具特人用之有違其材所以每

形君子之歎有若府君材信美矣乃使之淹回下列無  
以吐其胸中所蘊及逢世亂則建策禦寇親往諭降卒  
使革心從化其氣量足以有爲使之專城而居必有赫  
著愷悌之政奈何斲棟與梁而以榱桷用之嗚呼果誰  
之咎歟然而天定終能勝人府君固不遇矣有子以詩  
書起家爲時名臣貤贈所及至于二千石之榮可無憾  
於九泉矣瀛雖不及拜府君床下而幸與溫游溫以前  
進士孔克表狀走金華山中徵予銘義不得辭銘曰

天之生材小大異宜用或倒施乃人之非恂恂林公厥  
材孔脩苟竭其蘊可鎮方州闕市之征曷我溷之公笑  
曰嘻我斯受之料量既平出內無愆人或不足我則裕  
然山寇跳踉鋒蝟斧戕以斂以攘以撼大邦公乘單舸  
直入其阻威容言言其氣若虎賊黠而疑羣而趨之執  
刀圍之人爲危之公聲如雷震破賊膽再拜稽首今則  
焉敢轉彼昏昏易爲昭昭棄其戈矛爾忝爾苗古有薦  
士達諸巖廊孰持使節不發一章公雖不遇有子承家

龍光炳煥泉壤增華建牙之鄉馬鬣其封史臣勒辭無愧於衷

元故湛淵先生白公墓誌銘

嗚呼是惟湛淵先生白公之墓先生諱璉字廷玉白其姓也出於宋丞相時中之裔世居文水時中之從子翼扈蹕南渡官至防禦使生武畧大夫良輔食邑攜李因家焉武畧之後又至武功大夫顯始占籍於錢唐生修武郎必騰修武生通武郎嶸先生父也妣方氏先生本

四明名儒舒少度遺腹子通武育以爲嗣五歲能屬對  
八歲能賦詩十三受經太學習爲科舉業轟然有聲場  
屋間一時貴人爭欲出其門下甫及壯元丞相已頗平  
江南聞先生賢檄爲安豐丞辭不赴乃客授歲書之家  
晝繙夜誦燈墜花穴帽不知也如是者一十七年程文  
憲公鉅夫劉中丞伯宣前後交薦之復以疾辭中歲嘗  
出游梁鄭齊魯歷覽河山之勝登臨吊古訊人物風土  
慨然有尚友千載之意及至燕王公貴人見輒賓禮或



欲舉爲東宮官者先生復引義固辭南北孤遠士久困  
逆旅則必昌言甄拔之自是學益充文益富而家益貧  
宣慰都事鮮于公樞師一時名士援杜甫邵堯夫故事  
共買屋使之居會李文簡公衍出將使指喟然歎曰有  
才如是坐視其窮可乎力挽起之授太平路儒學正先  
生不得已應命未幾攝行教授事悉心官政修建天門  
采石二書院政成當時事例可貢行臺令史達官勸之  
行先生笑曰吾守章逢爾它何覲哉尋轉常州路儒學

教授兵燹之後禮殿與堂廡皆廢弗治祭器載籍亦闕

先生爲完之且復侵疆三千餘畝俄再遷教授慶元末  
上翰林集賢兩院謀曰白先生淹回下列吾儕不啓齒  
一言可謂汗顏矣共慰薦之陞江浙等處儒學提舉司  
副提舉階將仕佐郎時鄧文肅公文原實爲之長與先  
生志氣脗合舉刺得宜文化大行秩既滿銓曹有不知  
先生者署淮東鹽倉大使先生自以鹽筴非所諳習不  
俟終更即謝事養病海陵遠近學徒擔簦相從者殆無

虛月先生已六十又七及再遷從事郎婺州路蘭溪州  
判官則不復有宦情矣日與韻朋勝友曳杖游衍街杯  
賦詩唯恐日之易夕所居西湖有泉自天竺來及門而  
匯榜之曰湛淵因以自號晚歸老栖霞又號棲霞山人  
以天曆元年九月十五日卒年八十一其年十一月二  
日塋錢塘縣履泰鄉棲霞山之陽其子遵治命題曰西  
湖詩人白君之墓云先生性至孝母病刲股和藥起瀕  
死者再及歿號慟自擲嘔血至數升父感竒疾醫言必

得兔屎可療先生踏氷雪緣崖穴求之三日不得父死  
抱屍哭絕而復蘇繼母虐不予厥子先生事之愈恭既  
而改適他氏無甌石之儲先生爲營朝夕且負其避兵  
迄免於難然汲汲行義尤不顧家之窶孤嫠不能昏者  
嫁之死而無所歸者槁殯之道中拾遺珠待其人訪索  
審而還之或以質劑假金匱乏不獲償焚而慰之生平  
無驕辭怠色一以謙抑爲事聞人善未嘗不豔慕見揚  
人過掩耳亟避去奉先之外不惑異端不諂瀆鬼神疾

疾憂患之來一委之於天自幼至老無一日廢問學故  
能長於詩文紫陽方公回稱其冠絕古今有英雄大丈  
夫氣剡源戴公表元謂其注波五經之淵披條百氏之  
畹廬陵劉公辰翁又言其不爲雕刻苛碎蒼然者不惟  
極塵外之趣兼有雲山韶濩之音皆確論也翰墨雖有  
餘事亦有晉魏風酒酣命二童持紙懸筆一揮疾如雨  
風聲光翕然四達而先生素志丘壑以退爲進故位不  
逮名君子惜之先生娶沈氏有賢行前二十七年卒子

二賁文林郎南安路總管府經歷采溫州路永嘉縣鎮

海東寨巡檢女一歸常州路儒學正鄭禾孫四相越東

明皆蚤世孫女一適平陽宋允恒允恒由紹慶路儒學

正陞授新州新興縣福緣寨巡檢賁以子天命允恒仲

子範爲後範有學而文能繼其家者也範生子二弦孜

女三先生所著書曰詩曰文曰經子類訓曰集翠裘曰

靜語皆二十卷嘗鋟諸梓四方多傳誦嗚呼先生已矣

濂也晚出雖不能識先生幸從鄉先生黃文獻公遊聽

談杭都舊事有如淮陰龔公開嚴陵何公夢桂眉山家  
公之異莆田劉公濩西秦張公栢虎林仇公遠齊東周  
公密凡十餘人相與倡明雅道而先生齒爲最少乃與  
羣公相頡頏南北兩山間其遺跡班班故在僅踰五十  
春秋而先輩流風遺韻弗可復見不亦悲夫嗚呼死者  
固不可作若并其言行而不彰將何以爲聳善扶俗之  
勸於是狗範之請鉅細畢書之嗚呼先生之名其果待  
文而後傳哉銘曰

虎林有善夫兮秉德良優柔嗜義如嗜利兮避名如避  
讎指退以爲進兮謙抑每自修知分中自定兮不假外  
物求天經況所惇兮血淚交頤流冠冕百行先兮倫品  
庶不偷發越見聲詩兮笙鏞間鳴球律呂素和協兮八  
音交相繆雄章落四海兮虹氣日夜浮棲霞有名山兮  
草木光如油紀德薦石章兮千古振諸幽

汪先生墓誌銘

新安之婺源有隱君子曰汪先生諱炎昶字茂遠學聖



賢之道不求聞於世年七十八以元重紀至元戊寅四月二十四日終於家初元既滅宋宋太學生孫公蒿悲哀不自勝歸隱海寧山中誓不與接發爲賦詠以寄其無窮之思孫公同時進士許公月卿亦入婺源山中製齊衰服服之以識其終身哀宋之意此二公者皆新安之節義士先生受學於孫公而與許公門人交友故自少慨然無仕進志先生壯時元有天下已久宋之遺俗變且盡矣而先生衣冠動作語言禮度猶宋人也後生

小子去宋遠無從徵之見先生咸以爲前代之遺賢而先生亦曰吾古逸民也學者因稱之爲古逸云先生少凝重記憶不能過人然刻苦專篤雖執七據枕不廢誦習力久思深該貫宏博遂無所不覽要其歸宿精索於六經而詳究於孔子孟子曾參子思之言參之以伊洛大儒傳註之說絲析髮解日攻月較不故求爲異而亦不苟爲同其所自得既形於言雖不欲求人之知然人有辯其未至者必樂而從之終其身未嘗自以爲是也

其教人履庭躋級具有條序爲文奇而不肆遇時觸物輒爲詩以達其情婉切悽壯人傳誦之蜀郡虞文靖公集巴西鄧文肅公文原皆盛稱其才而先生志操之高人莫之知也先生家貧事母能致其樂母年八十九先生亦老矣夢夢祇肅進食奉水必躬親之母爲忘其貧先生將終整冠坐命家具蔬食少飡置筯戒諸子以祭祠之禮言畢正身斂手而逝先生之曾祖諱冲祖諱天衢父諱季安裔出於唐越國公華娶江氏生三男子曰

淮琛照乘棠金照乘爲弟禹玉後一女適詹某其孫男  
三人曰某某先生所著有四書集疏藏于家詩文凡  
若干卷先生卒時棠金已死淮琛貧未能葬命從子齏  
告於先生之門人趙君某請輯羣行爲狀趙君以未葬  
辭既而淮琛亦卒後十九年至正丙申某月日齏始買  
地塋先生於黃京山高路原又以爲請趙君乃爲狀屬  
余銘余諾之未獲爲去塋之歲又二十四年余欲銘先  
生墓而趙君之死亦已久矣於是撫几歎曰先生之卒

今始四十餘年而先生之子及門人知其事者皆已亡矣使復越四十年其能有知者乎爲善者固冀人知已然有善而不聞於來世後死者之責也乃本先生之志爲銘以告世之知先生者銘曰

朔風荒荒海水赤矣宗社爲墟將安即矣冠履倒植命之忒矣高蹈避世舍道焉適矣彼夸者子羣趨弱矣人之攸樂我心戚矣爲陵爲淵孰失得矣嗚呼先生千載是式矣

端木府君墓誌銘

子友端君以善既卒之一年其子智衰經踵門泣拜而請曰智也罪釁深重禍延先公以洪武癸丑三月乙卯卒于南京之官舍壽僅五十又三遂以是年某月某日塋于嶢山東村之原竊惟先公自少有志事功其善政在人者今多能言之又十年則言之者或寡矣又十年則無人能言之矣此無它人遠者其言湮世易者其事晦亦恒理爾一念及茲寧不使人興懷乎然而托名文辭者可以垂之無窮千百歲猶夫一日也此爲人子者

所恃以無恐願先生進之按學子劉剛狀君諱復初以  
善其字也姓端木氏其先爲衛人出於孔門弟子子貢  
之裔今獨以端稱氏者從省文也一遷於大梁再遷金  
陵烏衣巷三遷於淶水縣之巉山其詳備見譜圖記中  
曾祖時中祖安父邦達妣某氏君有遠志不肯寂寂落  
人後至正初以儒試吏江南行御史臺同列多貴遊子  
弟爭事表暴君獨泰然不失其恒行久咸畏服之俄遷  
書吏海右憲部君佐部使者行州縣彰善癉惡威聲獨

著聞會四方兵動東南爲尤甚君袖策言時政之急如此則可守如此則可戰否則有斂手就降而已上官聞之皆落落不合君仰天歎曰彼以吾發狂言耶時事從可知矣於是悵然有鄉土之思溧水道絕不能歸僑居金華日以書史自娛至正己亥皇上親御六軍取金華命常忠武王鎮之王聘君至幕下未幾君辭去會有言於朝者癸卯三月召爲徽州府經歷徽爲江東大郡政繁而賦殷君悉力佐治百廢具舉功則歸於其長田賦



久不均民不堪命君即城東建局使民自實田集爲圖  
籍覈盈朒驗虛實而定科繇吏民陰爲欺弊痛謫之不  
數月而畢由是民無逋租官無橫歛三皇孔子廟皆築  
臺門旅館之制亦廢君或葺或建咸中程式賦不及民  
皆若不知者丙午冬改通判吉州府吉俗尚譁訐素號  
難治民召父老子弟戒之曰予聞爾民尚豪侈樂訟聞  
朝廷子惠元元春雨秋露無不霑濡爾曷爲良民以報  
上德寧梗化以自戕耶梗化弗祥天刑所不貸爾其識之

民皆惴惴無敢執牒妄訴者丁內艱服除洪武辛亥春被召赴京除磨勘司丞時官署新立凡泉粟之出納刑法之是非物貨之變易無所不當讞君從本達支自流徂源勾稽隱伏纖芥軒露每一奏對上輒延譽之未幾陞爲令君嚴於限域人見輒畏不敢有所請托俄僚屬皆以貪墨敗磔首東市唯君能獨存清白之行益表見朝著間冬十一月起授嘉議大夫刑部尚書君之用刑本諸法律而持以平恕老於議法者咸以爲允杭州馬

甲飛糧事覺逮繫者百餘人詔君往治其獄分羣囚別  
所人各鞠之合其辭叅焉同多者情真否則偽郡守以  
下皆服罪壬子春三月拜湖廣等處叅知政事階中奉  
大夫湖廣素號重鎮屬兵戈蹂踐之餘土曠民稀君首  
下屬州民復業者復其賦一年次閱官書凡糧儲轉輸  
錢幣出入與夫軍裝工役皆預爲計畫且會官屬問事  
不集者其故何繇皆曰二省所轄府州縣二百有餘遠  
者在千里外每官多闕其事因不集君奏請于朝擇在

職賢良吏攝其政不數月無事不舉民驚以爲神既而  
以事召還京師俄以疾卒先配石氏前卒繼王氏子四  
仁義禮智皆石產也仁先卒君天性甚孝自遊宦四方  
不能奉驪膝下心常慙慙然所得祿賜恒歸以娛親其  
奉已則泊如也母既卒一念及之輒潸然泣下居官能  
守貧嘗著座右銘曰爲官實難貧然後安事有不可急  
中存寬又曰心契上天脚踐實地人謂其能自警云君  
狀貌秀偉美鬚髯音吐鴻暢或治政弗暇休夜則焚膏

命諸子環侍取書之嘉言善行歷歷訓戒至夜分乃止  
故翰林學士朱升嘗謂君爲人其謙退似懦夫其專謹  
似腐儒瞻視精悍似俠客掀髯談世事似辨士而其精  
神超越又似逸人仙者君子謂爲實錄予托交於君頗  
久而著動焯能固後死者之責銘烏乎辭然而年日已  
邁文日以衰無以應四方之求近因燭毀筆硯一切謝  
絕之而中心猶以爲未慙也雖然智之所請則有不得  
而忘情者遂備采剛之所錄而繫之以銘銘曰

惟士也良有志則剛如挾干將始晦而夷出遇而熙一躍而飛筮仕府僚因賦定繇功而不驕轉佐方州革俗以媮訓言繭抽磨勘設曹蚕絲牛毛孰得而逃進領秋卿邦憲是經中乎準繩往蒞大藩以執政原江漢又安材長如河壽則弗多其如命何有子治經足繼簪纓縱死猶生巉山之原木古泉寒銘在不刊

故新昌楊府君墓誌銘

越之新昌有大山曰彩烟與沃洲天姥鄰而彩烟尤爲

峻絕遠望之如雲霞繽紛天際故名山之絕頂其平如掌沃野數千里桑麻蔚若犬鷄之聲相聞或者嫓之武陵源云大姓楊氏自隋末來居之閱數百年而書詩之澤有引弗替在宋之時父子兄弟至連舉於有司而嘉泰壬戌進士轟其仕爲尤顯官終朝奉大夫知廣德軍州事贈奉直大夫廣德之從子佑祖亦由太學舉進士爲婺之浦江丞丞生子昱昱生裊裊生府君諱居字溫如生三月而其母梁氏亡父命乳母鞠之性穎悟八歲

能賦詩及長聞天台於先生子惠傳伊洛性理之學執經而受其說久之融通諸家言而貫以一致神暢心怡實欲起古人千載之上與之晤語既又以爲言之不文不能以行遠復從同郡韓莊節公游取文章大家日研摩之其於分章遣辭之法辨其類不類尤嚴其界域時先師黃文獻公以文名當代府君撰長書贅見之公讀已嘖嘖賞愛更揭諸座右賓至則指以示之曰是豈非文耶公爲人極慎許可其器重之若此府君嘗以春秋



學應書鄉闈不利遂掩關不出下帷而講授四方學子趨之者如雲府君日據高座隨其性資而開導之如蒙大霧而行不自知其沾濡之至學成而去多著名于時人問之則曰我楊先生弟子也恩義隆洽不敢更名他師府君性至孝父有疾晝侍左右夜不敢解衣寢臨穴之日號絕于地良久而蘇歲時祭祀必預齋戒眠滌濯盛服拜跽儼如祖考之在乎上瞻塋有田爲豪民所據府君帥宗人白于官復之仍創庵廬以居守者府君介

而通莊而能溫未嘗妄言咲一動一靜皆可爲式程善  
古文辭尤長於詩騷亦有愛齋稿若干卷藏于家府君  
出處之際唯道之從視不義富貴真若浮雲臨財尤廉  
路拾遺金俟其主還之里有喪及飢餓者恒周之學者  
方自以爲得師年六十六不幸以洪武九年丙辰冬十  
一月二十日卒于家明年丁巳春三月十九日窆于金  
山之原在家西四里而近娶同邑趙氏生男子四長宗  
學先卒次須學去爲浮屠更爲梵唄有聲叢林間次願

學繼父之業次學女子一歸士族盛必勝孫男一自牧  
女一尚幼子聞之文者將以載道道與文非二致也自  
夫世教衰民失其正高談性命者每鄙辭章爲陋習拘  
泥辭章者輒斥性命爲空言互相譏訕莫克有定殊不  
知道與文猶形影然有形斯有影其可岐而二之乎是  
可嘆也已府君以超卓之姿窮理攻文孜孜弗之倦務  
欲合而一之亦可謂知道者矣銘曰

大道流行日用昭宣非文載之道孰與傳安可岐之徇

於一徧迂夫曲士牢執弗遷擿埴索塗何往不顛有倬  
夫子式窺其全以彼校此孰爲愚賢鐫石幽壙過者察  
焉

故朱府君文昌墓誌銘

予居浙水東時得朱君好謙之文嘆其善於修辭惜未  
及與其交而好謙歿于兵及來京師又得好謙從弟文  
昌詩閱之冲澹類漢魏雄健如盛唐復嘆曰何朱氏一  
門之多賢哉未幾國子助教曾君旦初同文昌冢子堅

持知嘉定州事張銜狀來謁墓道之銘蓋文昌之死已  
四年矣予重違曾君之請不敢辭文昌諱嗣榮文昌字  
也姓朱氏出唐散騎常侍滿之後滿本歙人來徙金溪  
明暘里世爲衣冠甲族宋道州營道丞登生太學上舍  
生恢之恢之生銓銓生貴清貴清生仲梓文昌父也元  
初避地桃峯復遷家焉文昌治舉子業甚精通毛氏詩  
訓故折衷於朱子之說毫分縷析唯恐不合情性之真  
下筆千餘言不休走試江西鄉闈立論與有司不合即

棄去一假古律詩以自見歷代諸大家皆探微索隱必欲得其旨趣而後已用工之深出語輒驚人然不特精於詩甚輕財仗義尤人不易及少時嘗以錢粟貸於人一旦自責曰蠅頭之利其能汨沒男子之志邪悉集受貸者於庭取其所留質劓面焚之其後家單無旦夕之儲恬不爲恠人有憫其貧畀良田百畝者文昌疑其不義辭弗受鄉友罹患難屬文昌爲之解紛餽白金一鎰爲文昌壽文昌笑曰吾雖貧亦惡用是哉卒直其事而

還其金至正壬辰江淮兵動里之無賴少年相挺爲變  
其首禍者頗與文昌游乃來說曰公藏器于身不以此  
時取富貴尚何俟耶文昌叱之去遂與絕交未幾竟敗  
沒文昌宗黨知事變不測推牛醢酒起兵爲堡障屹然  
孤立數年而羣寇不敢犯文昌之功爲多僞漢陳友諒  
犯南昌諸郡相繼陷文昌曰此非吾輩之力可支盍各  
逃死乎乃挈一族入閩中雖備嘗險阻畧無怨悔意後  
五年國兵取江西州縣皆入職方文昌始還鄉里卜居

澄源上遺落世故絕無毛髮縈心所不忘者唯詩耳因  
扁其室曰嘯雲軒云東平穆敬來爲縣欲起文昌爲縣  
學師文昌曰吾老矣唯逍遙林壑爲宜耳橫經講道豈  
所堪哉因固辭而去性愛佳山水自謂得堪輿家不傳  
之秘稍暇輒布韉青鞋登陟不少倦不幸以洪武七年  
二月十四日卒壽五十六所著書有政鑒若干卷燬于  
兵尚存詩詞三百餘首題之曰燹餘集娶王姜二氏王  
先十九年卒子二曰堅曰重堅即請銘者孫二曰振振



曰繩繩孫女一某年月日卜葬明暘里長岡山文昌所  
自擇也夫詩之爲教務欲得其性情之正善學之者危  
不易節貧不改行用捨以時夷險一致始可以無愧於  
茲如君者蓋近之矣世之人不循其本而競其末往往  
拈花摘豔以爲工而謂詩之道在是惜哉銘曰

詩之爲教著于禮經溫柔敦厚本諸性情君子讀之豈  
惟多識玩其指歸感善懲逸我旣生塵我衣懸鶉非義  
之物弗取諸人如斯學經庶可無愧留連光景敢曰吾

事彼蒼者雲其色可餐洗心滌慮是躋是攀髮猶未皓  
嗒然觀化何有外慕無晝不夜長岡之原桂老水寒  
鬼未歸茲焉是安惇書爾銘詒爾孫子慶源方深其流  
瀾瀾

故温州路總管府判官宣君墓誌銘

始漁游學諸暨時與烏傷樓君彥珍浦陽宣君彥昭鄭  
君浚常浚常之弟仲舒同集白門方氏之義塾塾師乃  
吳貞文公立夫蓋鄉先生也彥珍最先還而漁與彥昭

浚常兄弟講學將一期當夜坐月白俟公熟寢輒携手  
出步月下時皆美少年不涉事競跳踉偃仆爲嬉戲或  
相訾謦或角觝其力至不勝乃止獨漁樸慙易侮不敢  
時相逐爲驩彦昭於其間尤號雄俊彦昭頤目穹鼻須  
髯森然如戟顏面鐵色類河朔間偉人見者莫不畏之  
已而各西東散去浚常仲舒之燕都客太傅右丞相家  
馴致顯仕浚常官至僉江東建康道肅政廉訪司事仲  
舒累遷太常博士彦珍受太師德王薦爲玉龍千戶所

管民司長官彥昭知印行宣政院以年勞入選擢承事  
郎温州路平陽州判官轉本路總管府判官歲辛丑浚  
常早卒後九年己酉彥珍亦卒又四年壬子彥昭亦受  
誣以死其幸存而未死者唯濬與仲舒爾浚常彥珍之  
墓濬常爲之銘仲舒謂濬不可獨後於彥昭嗚呼前後  
未五十年而世變不可知者已如此銘其可足恃耶雖  
然不敢辭也彥昭姓宣氏邑其諱也世爲浦江人生長  
富家而不染綺紈之習別無嗜好唯購書不知休或請

脫衣中以償亦不靳入仕極清白凡所需之物必取給于家毫分不受於民在平陽時吏隸畏其不相容各去而更他業儒生有百畝之園爲世家所侵雖屢訴有司輒以厚賄屬吏連年不決彥昭立斷還之儒生函金爲謝彥昭叱去曰顧法當爾吾豈私汝者耶彥昭恐童奴陰受之陽縛就地持杖大聲曰儒生所送金何在童奴垂涕曰其實不受金彥昭釋之曰吾姑試汝爾後十日儒生盡菜一本裝潢成帙入謝曰判官清苦敢以一菜

爲獻彥昭曰是雖微物終有私意存遂題識而歸之天  
大雨民與軍爭簷民曰我物而軍取之軍之辭亦然絕  
無證佐者彥昭命裂而爲二並驅出使隸卒踵其後軍  
忿譟不已民曰汝自失簷於我何損耶隸卒以聞彥昭  
杖民令買簷償軍其在溫府治聲如平陽會大俠起東  
海來攻府城戍將問計於彥昭彥昭曰此烏合之衆耳  
宜帥精銳大開城門搗退之寇果敗北自是屢戰屢捷  
戍將氣驕頗易之寇乘隙入城戍將被擒而彥昭亦受

縛彥昭瞋目罵曰天子何負於汝乃構亂邪寇怒欲兵之民翼蔽其背泣曰寧殺我毋殺我判官寇義之而止彥昭得解夜縋城而出請兵於方嶽連帥欲爲殄滅之計無有聽之者彥昭知時事不可爲歸卧孫井山中已而元亡大明受命有詔起江南文學之士而彥昭與焉上將官之彥昭辭以疾不受復還故山彥昭之兄財賦總管府知事彥高風流蘊籍爲多士之冠彥昭與共論上下二千年治亂至抵几太息間操觚成詩酬答不已

襟懷沖曠外物若不能擾之兄弟又善音樂遇風日和  
麗對坐海棠洞底取檀槽琵琶彈之侑以樂府新聲醺  
酒仰天而飲不至於醉不休會婚家乾沒里氓田氓搯  
登聞鼓訴冤誣彥昭關通州縣以致事不直彥昭實不  
與聞也逮彥昭至刑部婚家引伏部吏并罪彥昭彥昭  
抗辭曰我實無罪柰何不爲白行當於殿陛前辨之吏  
怒下獄幽之彥昭氣憤憤無所洩不食三日死口鼻出  
涎涕凝結鬚上成冰實洪武壬子正月某日也壽六十



其子騏收骨歸塋於某鄉某山之原禮也彥昭曾大父  
某大父某父嗣良母某氏娶方氏生三子長即騏次駟  
次駱女一適洪某孫男三某某嗚呼彥昭之事行其  
都凡如此瀟灑爲序之皆出於人心之所同不敢以私  
好變易其辭蓋期傳信於來世云復收淚而著銘曰

非學之弗覆胡軋之而使屯邪非才之不揚柰何不得  
以伸邪百齡幾何孰爲短長達人大觀其得喪固均邪  
墓草荒涼青而復黃寧不使余感舊而傷神涕淚而沾

巾耶

故處州翼同知元帥李君墓誌銘

元季之亂江南諸郡多陷于盜獨處州以士大夫倡義  
兵堅守而完及今上渡江始降其城邑故處稱善郡是  
時起兵之士麗水有葉君琛青田有劉君基龍泉有章  
君溢與三君並稱者曰李君汶亦龍泉人其舉謀興事  
不甚相遠其後三君在國朝爲顯官故天下皆知其名  
李君早致其事以歸是以其功不顯然其鄉人至今以

之儼三君則不以其位也君諱汶字彥父氏爲季元至  
正中率壯士從石抹忠愍公宜孫討賊數戰數有斬獲  
功授義兵萬戶經畧使李國鳳承制改龍泉縣尹不就  
國兵破處州擢安南翼總管會賀李二將叛殺總制孫  
炎處大擾君勒部駐白巖出其不意攻之已而中書平  
章政事邵某亦引兵至左右夾擊遂誅賀李復其城事  
聞陞處州翼同知元帥賜白金孟文綺青田盜葉賢三  
燒浦城政和兩縣掠婦女畜產而南君告胡總制深伏

兵平山嶺邀擊斬之出私財贖軍中所掠耄倪遣還其  
家民德君肖像而祝者甚衆洪武元年上即位君入見  
于便殿辭疾乞骸骨上亦老君遂錫宴儀曹賜襲衣冠  
帶金帛遣歸居九歲以十年正月廿六日卒壽六十君  
少讀書多智略事親孝服喪如古禮族人貧者買田以  
贍之不能學者延師以教之外主父無嗣爲立其宗人  
之賢者且割田畀之祀鄉民老無以養者月予粟病則  
施藥死則給以槨殯民苦嫁女育女多溺死君說以父

子至理有育女者以粟六斛養之嘗出見羣姬灌苗色  
饑甚遺以囊中金十兩而去其爲人望之凜然與之語  
溫然久而知其爲豁然長者也君曾大父諱泰來大父  
諱僅父諱鏡其先在宋時多顯者娶張氏先卒晚娶葉  
氏二男子槩槩槩爲母弟漳後一女適張守成孫男四  
炳允順允齊允中余與劉君基遊因聞君事及君卒槩  
復奉工部員外郎劉君狀趨京師請銘且言將以某年  
月日塋于劍池鄉大運里某山之原不可無銘乃爲之

銘銘曰

元運將傾四方震驚海恠山妖執殳逞兵括有季君實  
奇壯士手麾義旌從者如水左捕右攘朱衣銅章卻而  
弗居以待真王真王之興雷轟風行孰戕守臣敢觸天  
刑長劍如林萬夫一心扼其咽喉執斧礮平帝念峻功  
賜金賜爵掃除東南罔敢不恪飛龍御天虎拜陛前  
亂既息乞身林泉帝曰歸乎齒則既多大帶巍冠輝于  
鄉閭鄉閭有言君績孔偉死而弗朽不在太史揆行考

勲以焯以宣遺德在焉彌久而傳

莆田陳府君墓誌銘

君諱中立字誠中姓陳氏莆田之忠門人其先有名畧者宋紹聖間舉進士官奉議郎曾祖諱子文祖諱君保父諱高有學行學徒私謚曰靖逸翰林侍講學士晉安張公以寧銘其墓母林氏君季父諱齊早死無子君以祖命後之少受經于溫陵盧公琦公以文學著稱君聞其指授色承心解日騫月邁莆士皆歎服之元至正間

部使者行縣集經生試君輒魁諸生會張潞公翥以脩  
撰使莆見君文誦而奇之由是君名益著然就有司試  
即不利君語人曰我命薄故爾非吾文之罪也遂隱居  
不復有仕進意晚乃結廬壺山年五十有三以國朝洪  
武十一年正月十二日終于家君事先有禮每諱日必  
素服悲哀至終身不怠初君之祖暨父欲營義塾以教  
里中子弟規制未備而歿君繼先志創廟建學學後爲  
祠祀艾軒晦庵夾漈三先生復爲祠廟右奉其師盧公



之主講說有堂燕居有室凡學之制無所不完割祭田  
十餘畝以食爲師者儲山園之利以資春秋之祭凡爲  
淑人善俗之計者又咸極其慮君日陳經傳爲學者剖  
析聖賢大旨鄉人賴之嗚呼世之爲士者其未遇也常  
以無位不足施其所學爲憂及既得位則又顧畏怯縮  
爲其身謀終無所益於人者衆矣夫豈知君子之爲善  
固不在乎位之大小哉若君者一介之士未嘗受釜庾  
之祿而汲汲焉以化其鄉人爲心其亦異於懷祿尸位

者多矣君配國清林氏子男曰堂曰基女二長適郡人  
顧初幼在室皆林氏出堂將以是年某月日塋君于某  
山之原請銘于太史氏漁漁嘗銘君母墓聞君行宜銘  
銘曰

維古之士不以位世降俗媮位斯貴貴而無能冠狗彘  
豈若夫君賤爲庶居家孝友推以義闢廬建學躬訓蒞  
鄉髦如雲聆且肄少長斷斷類洙泗化器爲良暴更懿  
醇儒爲功斯小試嗟哉後人繼其志廟祀勿忘欽永世

故詩人徐方舟墓誌銘

庚子夏皇帝遣使者奉書幣起瀛於金華山中時則有  
若青田劉君基麗水葉君琛龍泉章君溢同赴召遂出  
雙溪買舟沂桐江而西忽有美丈夫戴黃冠服白鹿皮  
裘腰綰青絲繩立於江濱揖劉君而笑且以語侵之劉  
君亟延入舟中葉章二君競來謹譖各取冠服服之竟  
欲載上黥川丈夫覺之乃止瀛疑之問於劉君曰此何  
人斯諸公乃愛之深耶劉君曰此睦之桐廬徐舫方舟

也漁故聞方舟名亦起而鼓噪爲驩共酌酒而別聲迹  
不相聞者久矣自時厥後葉君

闕

南昌歿于王事後

五年章君爲御史中丞以卒又後十年劉君亦官至御  
史中丞受封伯爵投老于家復以一疾不起又二年漁  
亦乞骸骨還山白髮垂領頽然成老翁矣今年冬來朝  
京師忽方舟之子膺持中書舍人史靖可之狀來謁遂  
速之銘則知方舟之死已歷一十二年嗟夫人生如寄  
石火電光真不堪把玩如此良可悲哉漁因語膺以舊

事爲之悽惻者久之乃序述其事曰方舟故簪纓家自幼有俠氣好馳馬試劍兼善攻毬鞠之戲視拘拘法度士如無物稍長幡然悔曰此豈君子道哉即從師受章句爲進士業操觚爲文輒爛然成章已而又悔曰是如蠹書蟬出入于故紙中何有終期哉人生貴適意曷習古歌詩以吟咏性情庶幾少遂其願耳先是睦多詩人唐有皇甫湜方干徐凝李頻施肩吾宋有高師魯滕元秀世號爲睦州詩派方舟悉取而諷咏之鉢肝剝腎期

超邁之乃已積之既久圓熟璀璨明珠走盤而玉色交  
映也方舟猶以爲未足出遊江漢淮浙間與名士相摩  
切而詩道益昌江浙行省叅知政事蘇君天爵聞其賢  
力欲薦之方舟曰吾詩人爾其可縻以章紱耶避去日  
苦吟於雲烟出歿間翛然若與世隔因自號曰滄江散  
人天大雪乃泛舟釣江中終日戀戀若不忍舍去見者  
疑其非世間人元季兵亂益韜閉不出易爲隱者服人  
莫知其蹤跡所在有瑤林滄江二集各若干卷唐詩通

考若干卷藏於家云方舟平居喜怒不形于色無急步  
無疾呼罔測涯際性尚風義宛陵羅氏率五百指來避  
兵方舟衣且食之病者注藥死無所歸則擇地藏之久  
而弗懈事平具巨舟載其還家至正丙午正月九日方  
舟以疾卒壽六十八某年某月日墓于某縣霞川之原  
君子稽其自號題曰詩人滄江徐方舟墓表其志也方  
舟高祖某宋四川制置使曾祖某某路提舉常平公事  
祖某始自淳安遷桐廬今爲桐廬人父子竒元中順大

夫平江路總管府治中致仕妣皇甫氏妻張氏有婦道  
前二十九年卒子三人長曰行蚤世次曰鼎次即膺以  
文學受薦授淮安桃源丞女二人適某某孫男九人曰  
某曰某某等孫女二人未行瀟謂君子出處固立志之  
不同然亦有命焉當劉君之出也銜方舟以隱自高數  
欲挽起之會有故而止方舟獲終老於山林亦豈偶然  
之故哉予思方舟其人而不可得俯念疇昔盡然傷情  
乃歷序其故而銘之曰



有才不施一發乎詩日星月露草木走飛人事變遷可  
愕可悲舉無遁情入我範圍咳唾所及皆成珠璣一旦  
觀化竟無不之非湧醴泉定生靈芝昭德之符千載弗  
墟洪武丁巳冬十一月具官宋濂造

亡友陳宅之墓誌銘

嗚呼吾宅之死矣銘非濂孰能爲之初濂讀書浦陽江  
上宅之侍其舅氏吳徵君長卿來遊濂始識之徵君淵  
澄山聳發言不繁而咸中肯綮宅之氣象雍容揖讓合

節鳳和鳴而玉鏘如也。漁心異之，進謁徵君，退必與宅之言，問其所從師，則韓莊節公性黃文獻公潛也。問其所學，則治經爲進士之業也。漁時頗有志應舉，相與詰難經義，連日夕弗休。迨別去，猶依依南望，至日落乃止。自時厥後，宅之聲譽日起，大夫士唯恐內交之晚，廉訪使者行部，舉爲稽山書院山長，宅之辭宅之意氣方豪，謂朱紫可以引手致及，試藝有司，數上數不利，乃撫几嘆曰：慈親年高矣，予髮亦種種，安能逐三五少年競一

日短長耶即退隱大山中朝夕親側不敢少離去漁聞而悲之至正戊戌漁避兵徵君家已而遷宅之之西軒漁携室人賈專及仲子璲長孫慎三世爲四人爾心膽戰掉若喪家之犬宅之煦嫗而軫存之視漁猶弟兄遇璲與慎有若子孫宅之內子蔣夫人亦視專如妯娌然漁安之百里之外忘其流離顛沛之苦者宅之夫婦力也浦陽既入職方漁挈妻孥而還庚子之夏朝廷遣使者來召漁趣裝上南京擢爲王官與宅之別者閱十春

秋其依依之懷猶浦陽南望時暨以病予告東歸思宅  
之之心逾切病間竟騎驢往見宅之大喜履齒殆將折  
留連浹旬推羊豕以爲饗當夜半酒酣叙兵火離合語  
刺刺不能已既而掀髯高歌聲調激烈一吐壯年不平  
之氣瀟復悲其壯志雖不衰然亦頽然老矣居亡何瀟  
復起修元史進官禁林又將十年而璲同慎亦俱竊祿  
于朝瀟私自念皇明圖任黃髮以開文治如宅之者年  
縱邁豈丘壑所能淹將以其文行上聞璲慎咸爭曰陳先

生老矣得母不可於意邪乃止洪武丁巳春濂蒙恩休  
致于家始知宅之之歿已五年矣欲如昔日一見有不  
可得矣追念今古不覺潛然出涕專亦思蔣夫人之切  
復念宅之固云歿而夫人尚無恙行當胥會以慰中心  
之懸懸近有自諸暨來者則又曰夫人之亡亦已三月  
嗚呼悲夫濂知宅之之深者宅之歿矣銘非濂孰堪爲  
之宅之諱堂宅之其字也姓陳氏其先襄陽人十一世  
祖宋國子助教旦始遷于杭生餘姚知縣慤再遷諸暨

陶朱里曾大父某大父琳承信郎提刑司幹辦公事娶  
吳氏吳居縣東之流子里生子曰燦宅之之父也仍娶  
于吳遂依女氏以居爲流子里人宅之壽七十有七卒  
之日乃癸亥十一月六日閏月二十三日塋于戈溪之  
源娶黃氏壽六十前十五年卒繼配即蔣夫人有婦德  
鄉人稱之壽七十四後五年卒子男四鍊鋹鏞鎰亦  
前五年卒女二適吳義吳鏐鏐徵君長孫孫男六濟溫  
浦潤浩潛女二尚幼曾孫男四樟權梓椽宅之性雅飭

行乎患難能以理自遣室廬蕩於兵燹亟遷別墅曾無  
幾微見於顏色每速故人飲酒賦詩以自適其詩韻度  
深婉一篇出人競持去閭井之間恒樂觀之久而不厭  
徵君家將合族爲義居宅之左右徵君爲定科條以齊  
子姓至今守之嗚呼宅之已矣而徵君亦作土中人矣上  
距避兵之歲僅二十年人事變遷何所不有未知後二  
十年又爲何如也唯有善名著于時述作傳於人雖歿  
猶不歿也如宅之者是已銘曰

五彩弗施不如赭泥我哀乎宅之受才則丕其數則奇  
我哀乎宅之歛其奮飛發於聲詩我哀乎宅之墓門有  
碑太史勒辭尚足慰多士之思

金陵杜府君墓誌銘

金陵有孝義之士曰杜君諱元字一元其先居吉之吉  
水與會稽正獻公衍同宗至君始遊江東樂金陵土俗  
遂居之而爲金陵人君苦學有材氣能爲詩元重紀至  
元中張文穆公起巖爲江南行臺中丞見君詩願掾君



君不可欲以茂材異等薦又不從年若干卒以布衣終  
君少時父患靈疾夜數驚君冠帶伏父榻旁父驚起輒  
抱持曰兒在斯父疾數月君目不敢瞑至愈乃已母沒  
服喪得古禮甚聲聞日起貴人賢士多樂與君游君未  
嘗以事干之及有罷黜失志者則爲之力不怠行臺都  
事楊惠被劾去人莫造其門君獨持酒與飲而送之趙  
弘中爲御史掾坐法罷君徒步與俱行百餘里僦屋居  
之儒學教授張鉉以事黜君出金帛資其行其子四歲

失母君命婦鞠之不異已子兵部主事常允恭家人夜失火允恭方醉卧衆怖懾散走無賴子利其貲將劫之君率少年數十輩爲出其篋筭寶貨于外允恭泣謝曰微君吾其死乎隣人陳鼎舉室死于兵二兒匿舍側怨家復害其小者君曰脫并殺其兒則陳氏絕矣卒爲抱匿它所以免吉之部運吏輸糧金陵不足者三千斛吏受笞榜號泣莫爲計君憫之爲貸於大賈以償吏德君以物來謝君却之蔣山僧爲御史所誣夜竄君室求救

君藏之故人家僧獲全宋楊忠襄公邦乂廟在城南君以公吉人歲時率吉士游寓者具牲酒祭之君之爲義多類此君嘗攻醫尤良於治證疾病造君者不問有無必予藥藥必擇精善者服之必瘳金陵大疫君和藥走給之不得食者以薪米餽之賴君以生者甚衆由是人多稱君美及兵亂士卒相戒不忍犯君卒於至正丙申七月九日以丁酉三月十日權厝金陵清涼山右國朝洪武壬子十二月九日復改塋南門外之鍾家山夫人

劉氏祔焉君曾祖若海祖懋父文煜母周氏君二男子  
曰珙曰環珙早卒環承事郎晉相府錄事賢而能文精  
於書得晉人筆意二女適蕭伯高鄧世良孫男二某某  
孫女四人皆在室環與余交頗久以銘爲請余感夫世  
之交友者利之所在則趨有小害則避去不肯留目一  
顧或道上相值輒引袂掩面陽爲不識倘以事過其門  
策馬疾馳惟恐爲所汙况望其拯卹乎若君者可謂無  
讓於古君子者矣烏可不銘之以爲世勸乎君所爲詩

凡若干卷藏于家銘曰

杜喬孔鉅支著吉水其在金陵則自君始君才既多胡  
不祿仕非不樂仕義不屈已養氣爲文五色有煒孰非  
公卿接跡交軌彼微其權權銷志沮吾守吾義夷險一  
揆章服之加鞶帶之褫所交者心加褫何與拯難濟危  
存孤起死匪名之求惟義所止兵戈如林白骨千里君  
若不知左孫右子斯豈人爲天錫嘉祉天曷私君惟善  
之致貴有不聞賤有足恃刻文昭美以諭多士

臨海方府君墓誌銘

君諱濬字德明姓方氏台之臨海人五代時有以武顯者居臨海仙華山之東號東山方氏君其後也曾大父仲大父賢父本母韓氏君少孤能自拔擢超出流輩中誦書不求多解務見于用持身有威儀不妄譁咲儇薄子過其家躊躇傾耳不敢出聲喜延攬賢士至則沽酒與飲取其歡忻不顧惜貲費人有過弗匿於心輒面折之遇流俗則不肯舉目視至門亦不與語是以所交皆

台之有名者元季或薦名于朝授江浙等處儒學副提  
舉不赴會方左丞據海上賤儒多倚之求利祿君獨避  
匿日與里中故老緣躋山水間歌吟忘返庭有鉅檜每  
醉餘盤旋其下晚乃別號檜屏翁一旦得疾正衣冠危  
坐抗手與視疾者訣頃之乃逝年六十時至正二十六  
年二月十日也娶牟氏諱巽事姑孝宗族稱之年五十  
有八以今洪武二年二月二十一日終五年十二月九  
日合葬于仙華山之原四男子仁義禮本禮去爲浮屠

本以才薦擢起居注遷徽州府通判改知金壇縣事有  
政譽一女適董宏孫男六人組忠良桓金瑰女三人長  
適韓載二尚幼本爲起居注時與余同朝屢以銘爲請  
未果爲及余致政朝京師本至自金壇重以爲言退則  
自狀羣行使忠來速銘其辭文甚於是知君善教子也  
銘曰

維蔓方氏本於方雷事軒與舜曰明日回叔佐周宣功  
侔尚父紘在西漢始徙南土南土之方皆祖於紘派別



支繁維歛爲宗台之方氏始自歛分或昭或泯不大有  
聞君之先人嘗以武顯君隱不仕乃篤爲善善積在人  
彰善者天其將熾然盾子孔賢

莆田黃府君墓誌銘

莆田黃處士有良婿曰陳熙哀處士之早亡自狀其行  
千餘言走三千里來京師請銘且曰處士事繼母孝庶  
弟出後從父從父愛其女盡以腴田嫁之處士患弟貧  
割以私田之半族人以田來鬻處士不忍取乞以直而

歸之不能爲生者加衣食焉以貲多爲閭里之正里中  
民買鹽于官及科繇不能庾者出私財代輸有受誣者  
諍之於縣庭得解乃已每歲首縣次民貲力多寡定征  
歛之籍衆不能決處士發一言皆稱平爭訟者來質是  
非告以理法舉酒飲之各謝而退藝田家歸粟入以小  
量遇凶歲則減賈以大量糶之初郡南有僻壤盜常狙  
伺以剽行旅處士構廬棲僧夜則燃燈達曙盜散去復  
施貧死者棺三年至二百餘野無暴骨元末兵亂縣命

處士帥兵扼險晝捕賊策陳于上民藉以安處士讀書  
有識待物恕以和其生也鄉人教其子俾取爲法及其  
沒識之者無不弔弔者哭必哀至今言善人者稱焉熙  
又曰處士之善蓋多其類如此其使人感且化者不得  
而知亦不得而言也然其大者既不可言倘可言者又  
不得托文以傳焉則何以使爲善者慕敢請余曰處士  
之行誠可傳矣余言之不文烏足以傳耶雖然不可辭  
也處士諱已字景陽自唐屯田員外郎潛之子最不仕

至審知始自光徙莆在宋稱書詩之族高祖審再以進士舉于鄉與從兄某州通判君亮皆有名曾祖文子以五經爲州學諭祖來鄉貢進士父元壯母陳氏繼母鄭氏俱名族處士娶林氏無子先二十年卒再娶李氏生子男四人興祖振祖光祖麒祖女三人長壻即熙其二適吳某王某孫男五人隆庸洪某某處士初爲長女求壻富人爭欲問名不聽聞熙儒士許妻之或謂熙貧非偶處士曰我志決矣卒妻熙熙今爲連江儒學教諭有

文名君子又多處士善處其女也處士年四十二卒元至正十八年八月廿九日後五年殯鳩山下廿七年十月十二日權窆山之西今洪武十一年十二月廿八日始克葬于白砂之原銘曰

人不患財之弗贏而患善無可稱善集于身雖賤爲恒氓歷千載而有聲身爲鄙夫雖位居九卿溘既死而誰名維處士君足不出州里而化者衆身服乎韋布而德可程斯之謂死而如生



文憲集卷十九

謹案第六頁前六行薩達克齊舊作賽天赤今改  
十八頁前七行綽班薩里舊作全普庵撒里

今改







總校官庶吉士臣侍朝

校對官助教臣金學詩

謄錄監生臣馮堪